

F3134/2902.83(4)

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 31 1938

樂亭志卷
十九

樂亭縣志

樂亭縣志卷之九

名宦

文翁守蜀都賈人皆知向學魯恭爲中牟令童子亦有仁心良有司之移風易俗也舊矣永平係股肱郡而樂邑當郡之南向日瞻雲尤爲切近則夫宣上德而達下情以無負乎父母斯民之職者必且指不勝屈矣夫叔子有碑樂公立社人心所戴沒世勿諼可弗詳爲記叙以爲後來之師乎但舊志所錄僅及廿人而名目至標

哈佛大學漢和
圖書館珍藏印

六項未免強作區分茲特以循卓廉能二者統之志名宦其目二

循卓

廉能

循卓

不拂之謂循不暴之謂良民有疾痛撫之卹之民有欲求養之給之迹其平生惟樂只懼悌之惓惓而不以急功近名爲念似乎無可表見者而其政績遂已卓然大異乎流俗之爲然則循

良未有不卓異者若夫現行絕俗翹然負異於衆雖卓有樹立聲施爛焉謂之循良或未也茲故納卓異於循良內而不另立標題俾人知父母之稱在此而不在彼也

知縣

明

李瀚山西沁水人由進士成化十八年任邑故土城巡撫同本檄堯以磚更十餘年罔功自闡人汪直啓釁數有邊警人益恐公下車卽修

卷之九 名宦

築竣工至今攸賴儒學在文廟後湫隘特甚公
乃遷於廟左拓前後地數畝宏敞遂與廟稱又
鑄祭器育賢才文教蔚然其他惠政種種不能
俱悉大都潔己愛民寬而有則嚴而不苛故公
去逾百年而士民思慕不替隆慶初重修城東
北隅十餘丈堅鞏異常民不忍撤而止瞻者若
召棠焉擢監察御史歷官南京戶部尚書贈太
子少保

原 軒山西陽城人由進士弘治十四年任剛

方正直不畏權要篤志愛民屢著異蹟有古循
良風吏民懷焉歷官都御史

趙 寬山西垣曲人由舉人正德四年任性姿
方正有執持文學務治行誼表俗不事苛察而
吏民畏戴有嚴父保母之頌時嬖倖擅權有鷹
房闖人驛騷公召而詰之闖倨侮無狀公怒笞
焉坐是被逮下獄法官察其庇民無他乃擬贖
還職大家宰丞賢之亡何竟掛冠去迄今人稱
賢令

楊鳳陽江南宿州人由貢生嘉靖二十二年任
先是邑八年逋負未完公至嘆曰非獨小民罪
也咎在催者索收者侵督者徒鞭箠之奈何不
逋乃盡革諸弊酌緩急從便宜力絕其美于是
百姓樂輸流者歸業邑無逋負自茲始廟學繕
於成化間圯甚盡撤而更建之時有羣盜獄具
解府府胥沉案累及無辜郡逮拷訊欲置重罪
為白其寃獲釋寧忤郡公意不惜也他政類此
大都恤貧弱抑豪右懲刁惡清操不染業將遷

秩竟為人所陷題壁而去士民追隨嘆息有泣
下者

呂鴻山西陽曲人由舉人嘉靖三十二年任
賦性寬厚蒞政慈祥優士待民有如保母改教
授陞府同知

潘敦復字彥恒山東夏津人由進士萬歷十八
年任為政不事催科首崇撫字簡練鄉兵以備
城守修葺學宮建設倉廩邑無專志公纂輯二
百餘年故實以為一代文獻陞陞山西大同知

府

本朝

葉矯然號思菴福建閩縣人由進士順治十五年任性長者所至恤民善激獎喜吟咏著有龍性堂詩集

于成龍字振甲鑲紅旗人由廕生康熙七年任宏才偉畧清正有爲念恤民難首嚴苛派歲饑請賑實惠均沾繕城垣除積弊未兩年政通事舉以署灤篆呈誤士民叩閩保留于十年

任更修學宮勸開墾革里催詳除美化屯額糧以恤丁絕請退任印撥補地畝以免民貽累禮賢愛士緝盜安民十八年陞北通州知州歷官河道總督加宮保銜卒祀名宦子永禎於康熙十一年遭土寇劫城被執不屈死

儒學

明

劉邦彥湖廣龍陽人由舉人隆慶二年以教諭任學問宏遠志行端方凡威儀詞章皆綽有矩

獲以行誼作人以經術廸士諄諄戒浮薄釐陋
習一事不苟學者翕然向風陞高邑知縣歷大
理寺寺正

縣佐

明

任 逮江南蕭縣人由監生嘉靖二十六年任
縣丞家居孝親親終廬於墓側及佐邑政專慈
惠而性尤介直士論稱其孝慈無愧聖訓云

廉能

昔楊伯起不以貲財遺子孫而家傳清白是廉
者當官之首務也官而不廉名節已玷餘無足
觀果其立志皎然涅而不淄雖惴惴無華亦不
愧爲賢吏况乎廉則公公則明廉則慎慎則勤
一切才猷展布利弊興革皆能無所回護而爲
之沛然等而上之其爲循卓也不遠矣

知縣

元

柴本立至元間以鄒平丞陞邑令至則敬事勤

民無一夕懈廟學頽圯慨然嘆曰學校不修儒風靡振長民罪也于是捐俸全集同志撤而修之成不逾時民亦不告勞當時翕然稱焉

明

王文貴由人材舉卓異科洪武三年任當草昧初開公勵精爲治六事修舉凡學宮壇壝祠宇公署爲之煥然歷官大理寺少卿

郝 本山西陽曲人由進士弘治七年任賦姿英爽蒞政廉明陞涿州知州歷官陝西僉事

田 登山東武城人由進士弘治十年任興學育才政教兼舉擢監察御史

李邦佐河南陳留人由進士隆慶元年任時值多事公修繕城池高厚視昔加三之一增四門月城各置鐵棧樓櫓敵臺雉堞倍盛於前簡募丁壯製造火器民恃無恐性强直無阿徇剖斷如流除奸若刈一方戴之爲神君云擢禮科給事中後人爲立祠合前令李瀚並祀之

劉 松字耐寒河南衛輝人由舉人萬歷四十

七年任才具優長胸有幹畧安插避亂難民俾其得所絕不騷擾

李鳳翥字瑞徵山東樂安人由舉人崇禎元年任才裕性果加惠熒氓因忤當道意排擠之士民爭先保留不得立石頌之祀名宦

陳昌言號道庄山西澤州人甲戌進士崇禎八年任時國事叢脞綏輯有方民用不擾十三年行取民爲勒碑崇祀名宦

本朝

韓望字儼然陝西涇陽人由進士順治九年任吏治敏達剔蠹祛奸一時萑苻不驚強暴斂跡擢戶部福建司主事士民遮留自辰抵暮不忍舍去

金星瑞浙江仁和人由監生康熙二十一年任慈惠愛民隆禮學校修文廟崇祀典備樂器召募樂舞生六十四人槩予優免水壞城垣設法修築絕不派累民間接物和平而執法必謹強暴因而斂跡陞雲南師宗州知州

周采號雪堂三韓人由官監康熙三十三年任廉以節已惠以養民曩時邑有雜徵民尤苦之公一切革去歡聲遍野矜慎折獄凡兩造無不得其意而去

湯彛字篆辛浙江仁和人由監生康熙三十八年任臨民以寬待士以禮以才能擢永定州同知

王經陝西朝邑人由副榜康熙四十三年任廉以持已勤於視事以疾卒於官邑人至今懷

之

張德祁號聿修山西澤州人由舉人康熙四十五年任才幹明敏遇事果敢時邑被旗圈民無恒產公籌畫得宜民困以蘇御下嚴而不苟寬猛務得其平在任十年以疾卒於官民爲勒碑以誌遺愛

儒學

明

邵鑑河南洛陽人由歲貢正德二年以訓導

任平易篤實勤督課業訓迪有方士風變焉祀
名宦

賈奎山西蔚州人由監生正德十年以訓導
任性行剛方持守廉節造士勤敏綽有矩度嘗
條陳時事八條欲上爲上官所阻志大有爲竟
賈以沒士顛悼之祀名宦

王棐河南襄城人由歲貢嘉靖二十六年以
教諭任志行高明諸生貧者餽多不受修祭器
崇學舍手植松株至今存焉

崔佩山西沁州人由歲貢嘉靖三十七年以
訓導任立志端方待士寬厚諸生餽贄置弗
校以廉靜著聞

楊芳山東益都人由歲貢萬歷七年以教諭
任公年已耆衆謂爲溫飽尔往例新生進贄先
定甲乙衆以請公笑曰此豈市廛吾爲賈人邪
諸生覘其不校具儀甚涼公畧無芥蒂意其高
邁類此居常溫恭待生徒曲盡恩禮人樂親就
有過必正色戒諭亦不阿徇時以清正頌之

縣佐

明

賈澄掖縣吏員嘉靖二十七年任縣典史性直介志向高明不以刀筆自期待一介不染指使諭其賢溫詞面獎每屬以聽訟虛心研鞫聞者愧服巡鹽緝盜卓有茂績

武勳附

明

趙彛虹人洪武初虎賁百戶調燕山右衛從

潁國公征沙漠城宣府萬全懷來歷陞永平衛指揮僉事靖難兵至永平彛以城降從徐忠等轉戰有功陞北平都指揮使文皇即位封忻城伯食祿一千石與世券永樂十三年鎮徐州仁宗召還卒

郭亮合肥人父聚開國功陞流百戶亮嗣官征戰有功歷陞永平指揮從靖難與都督耿獻戰又與都督楊文戰皆有功時靖難兵南下亮獨守永平與北平為聲援建文四年封成安侯

世伯食祿千二百石出守開平築烽埃永樂二十一年卒贈興國公諡忠壯

吳 成本名買驢遼陽人父通伯元遼陽省右丞洪武中隨觀童來降買驢充總旗以出塞功陞永平衛百戶從靖難攻真定大寧鄭邨壩功陞指揮僉事廣昌白溝館陶功再陞指揮使夾河藁城西水寨功陞都指揮僉事戰淝河齊眉山靈壁小河先登渡淮克揚州入金川門再陞都指揮使永樂八年從上出塞功陞都督僉事

已而三出塞斬獲多洪熙元年陞左都督是年大松嶺破敵封清平伯食祿千一百石與世券宣德初從擒漢庶人三年出喜峯塞敗敵寬河斬獲進封侯祿如故八年卒贈渠國公諡壯勇

按谷祥吳興莊陳華同買驢戰功已具世紀

劉 江山海衛總旗驍勇有謀畧洪武末年從靖難累建殊勲陞中軍都督府左都督永樂中鎮守遼東勒殺倭寇有功進爵廣寧伯卒贈廣寧侯

房應祥號泰寰盧龍世胄歷營路參軍時永平
多事城守單弱兵備張春會撫按彙題命公爲
城守中軍專司團練鄉勇庚午揚武營兵守陴
縱火陷城公分守東面率所部堵埤血戰冒矢
石死事定贈驍勇將軍立坊表之仍祀武廟忠
烈祠子三長星華貢士歷福建漳州知府次星
耀不慕仕進多俠氣人雅重之季星煥歷山東
武德道副使有政聲卒於官人以爲公忠烈之
報云

本朝

陳柱國盧龍人康熙十一年任樂亭駐防把總
盜何縣尹公出詐爲行客人城肆劫柱國挺身
與鬪中流矢被獲縛令導引柱國裂眦厲罵遂
遇害事聞
詔賜百金襄葬事

韓璋字奉侯北通州人由進士康熙三十二
年任性脫畧不岸異與士卒同甘苦在任十六
年恩勝於威晉秩去官所部豎碑以誌遺愛

孫承勳字繩武陝西榆林衛人由世襲康熙五十二年任性沉毅有遠畧推功讓能士卒樂爲之用而紀律所在持之甚謹在任四年部下懷之去爲立碑

盧起鳳蓬萊人勤操練整營伍寧嚴勿寬無弛而不張之弊是以兵民和輯地方寧謐陞任後兵民咸思其德焉

樂亭縣志卷之十

人物志

邑自商周之際夷齊抗節爲百世師厥後召公德教被於全燕其間川嶽靈氣之所鬱蒸聖賢流風之所感發英賢輩出內則孝友爲政樹軌範於人倫外則政教及人顯功名於當世其德業聞望固有與日月爭光者其次則砥節勵行卓然有以自立更或鼓吹休明彬彬儒雅亦一鄉之表也爰志人物而以先哲弁於簡端其目

先哲

名臣

儒學

孝義

卓行

附寓賢
藝術

先哲

三代之事遠矣兩漢以來文章行誼有可稱紀
者里居世系國史紀之樂亭滙溟灤之秀宜其

鍾毓遠邁他邦而邑乘寥寥不少概見者
治未設之前孤竹無終北平遼西地名屢易
樂亭皆其所屬則諸君子之系籍此土者固
能臆斷其為樂亭亦無從而決其非樂亭也夫
首陽一山三省競標其勝延陵一邑兩郡並峙
其碑芳躅之係人仰止也舊矣爰約錄數人以
為邑中人物之啓明白大定後則不敢濫及

史記

伯夷列傳照
府志節本

伯夷叔齊孤竹君之二子也

索隱曰孤竹君是
殷湯三月丙寅日

所封相傳至夷齊之父名初字子朝伯夷名允字公信叔齊名智字君達解者云夷齊謚也伯仲又其長少之字正義本前注丙寅作殷湯正月三日丙寅

父欲立叔齊及父卒叔齊讓伯夷伯夷曰父命也遂逃去叔齊亦不肯立而逃之國人立其中子於是伯夷叔齊聞西伯昌善養老盍往歸焉及至西伯卒武王載木主號為文王東伐紂伯夷叔齊叩馬而諫曰父死不葬爰及于戈可謂孝乎以臣弑君可謂仁乎左右欲兵之太公曰此義人也扶而去之武王已平殷亂天下宗周而伯夷叔齊耻

之義不食周粟隱於首陽山采薇而食之及餓且死作歌其辭曰登彼西山兮采其薇矣以暴易暴兮不知其非矣神農虞夏忽焉沒兮我安適歸矣于嗟徂兮命之衰矣遂死於首陽山

魏志 田疇傳

田疇字子泰古北平無終人也好讀書善擊劍初平元年義兵起董卓遷帝於長安幽州牧劉虞歎曰賊臣作亂朝廷播蕩四海愕然莫有固志身備宗室遺老不得自同于眾今欲奉使展

效臣節安得不辱命之士乎衆議咸曰田疇雖年少多稱其奇疇時年二十二矣虞乃備禮請與相見大悅之遂署爲從事具其車騎將行疇曰今道路阻絕寇虜縱橫稱官奉使爲衆所指名願以私行期於得達而已虞從之疇乃歸自選其家客與年少之勇壯募從者二十騎俱往虞自出祖而遣之旣取道疇乃更上西關出塞傍北山直趨朔方循間徑去遂至長安致命詔拜騎都尉疇以爲天子方蒙塵未安不可以荷

佩榮寵固辭不受朝廷高其義三府並辟皆不就得報馳還未至虞已爲公孫瓚所害疇至謁祭虞墓陳發章表哭泣而去瓚聞之大怒購求獲疇謂曰汝何自哭劉虞墓而不送章報於我也疇答曰漢室衰頹人懷異心唯劉公不失忠節章報所言於將軍未美恐非所樂聞故不進也今將軍方舉大事以求所欲旣滅無罪之君又讐守義之臣誠行此事則燕趙之士皆將蹈東海而死耳豈忍有從將軍者乎瓚壯其言釋

樂亭縣志 卷之十一
不誅也拘之軍中禁其故人莫得與通或說瓚
乃縱遣疇疇得北歸率舉宗族他附數百人埽
地而盟曰君讐不報吾不可以立於世遂入徐
無山中營深險平敞地而居之躬耕以養父母
百姓歸之數年間至五千餘家疇謂其父老曰
諸君不以疇不肖遠來相就衆成郡邑而莫相
統一恐非久安之道願推擇其賢長者以爲之
主皆曰善衆咸推疇疇曰今來在此非苟安而
已將圖大事復怨雪耻竊恐未得其志而輕薄

之徒自相侵侮偷快一時無深計遠慮疇有愚
計願與諸君共施之可乎皆曰可疇乃爲約束
相殺傷犯盜諍訟之法法重者至死其次抵罪
二十餘條又制爲婚姻嫁娶之禮興舉學校講
授之業頒行其衆衆皆便之至道不拾遺北邊
翕然服其威信烏桓鮮卑並各遣譯使致貢遺
疇悉撫納令不爲寇袁紹數遣使招命又卽授
將軍印因安輯所統疇皆拒不受紹死其子尚
又辟焉疇終不行疇常忿烏桓昔多賊殺其郡

冠蓋有欲討之意而力未能建安十二年太祖
北征烏桓未至先遣使辟疇又命田預喻指疇
戒其門下趨治嚴門人謂曰昔袁公慕君禮命
五至君義不屈今曹公使一來而君若恐弗及
者何也疇笑而應之曰此非君所識也遂隨使
者到軍署司空戶曹掾引見諮議明日出令曰
田子泰非吾所宜吏者卽舉茂才拜爲裨令不
之官隨軍次無終時方夏水雨而濱海洿下漚
滯不通虜亦遮守扼要軍不得進太祖患之以

問疇疇曰此道秋夏每常有水淺不通車馬深
不載舟船爲難久矣舊北平郡治在平岡道出
盧龍達於柳城自建武以來陷壞斷絕垂二百
載而尚有微徑可從今虜將以大軍當由無終
不得進而退懈弛無備若嘿回軍從盧龍口越
白檀之險出空虛之地路近而便掩其不備蹋
頓之首可不戰而擒也太祖曰善乃引軍還而
署大木表於水側路傍曰方今暑夏道路不通
且俟秋冬乃復進軍盧侯騎見之誠以爲大軍

去也太祖令疇將其衆爲鄉導上徐無山出盧龍歷平剛登白狼堆出柳城二百餘里虜乃驚覺單于身自臨陣太祖與交戰遂大斬獲追奔逐北至柳城軍還入塞論功行封疇亭侯邑五百戶疇自以始爲避難率衆遯逃志義不立反以爲利非本意也固讓太祖知其至心許而不奪遼東斬送袁尚首令三軍敢有哭之者斬疇以嘗爲尚所辟乃往吊祭太祖亦不問疇盡將其家屬及宗人三百餘家居鄴太祖賜疇車

馬穀帛皆散之宗族知舊從征荊州還太祖追念疇功殊美恨前聽疇之讓曰是成一人之志而虧王法大制也于是乃復以前爵封疇疇上疏陳誠以死自誓太祖不聽欲引拜之至於數四終不受有司劾疇狷介違道苟立小節宜免官加刑太祖重其事依違者久之乃下世子及大臣博議世子以疇同於子文辭祿申胥逃賞宜勿奪以優其節尚書令荀彧司隸校尉鍾繇亦以爲可聽太祖猶欲侯之疇素與夏侯惇善

大祖語惇曰且往以情喻之自從君所言無告
 吾意也惇就疇宿如太祖所戒疇揣知其指不
 復發言惇臨去乃拊疇背曰明君主意殷勤曾
 不能顧乎疇答是何言之過也疇負義逃竄之
 人耳蒙恩全活為幸多矣豈可賣盧龍之塞以
 易賞祿哉縱國私疇疇獨不愧於心乎將軍雅
 知疇者猶復如此若必不得已請願效死刎首
 於前言未卒涕泣橫流惇具答太祖太祖喟然
 知不可屈乃拜為議郎年四十六卒子又早死

文帝踐祚高疇德義賜疇從孫續爵關內侯以

奉其嗣

按魏志疇為右北平無終人當在今玉田境然觀魏武表疇功曰疇率宗人避

地無終北拒盧龍南守要害且時封亭侯其事蹟皆與本境有合意漢時無終當不僅一玉田也因錄之其時更有國淵王修邴原管寧皆由北海避地遼東跡跡亦與境內近惜未有確證不敢強附

晉書

段匹碑傳

段匹碑東郡鮮卑人也種類勁健世為大人父
 務勿塵遣軍助東海王越征伐有功王浚表為
 親晉王封遼西公嫁女與務勿塵以結隣援懷

樂府集卷之十一
帝卽位以務勿塵爲單于匹磾爲左賢王率衆
助國征討假撫軍大將軍務勿塵死弟涉復辰
以勿塵子疾陸眷襲號劉曜逼洛陽王浚遣督
護王昌等率疾陸眷及弟文鳩從弟末杯攻石
勒于襄國勒敗還壘末杯追入壘門爲勒所獲
勒質末杯遣使求和於疾陸眷疾陸眷將許之
文鳩諫曰受命討勒寧以末杯一人故縱成擒
之寇旣失浚意且有後憂必不可許疾陸眷不
聽以鎧馬二百五十匹金銀各一籠贖末杯勒

歸之又厚以金寶綵絹報疾陸眷令文鳩與石
季龍同盟約爲兄弟遂引騎還昌等不能獨守
亦還建武初匹磾推劉琨爲大都督結盟討勒
并檄涉復辰疾陸眷末杯等三面俱集襄國琨
匹磾進屯固安以候衆軍勒懼遣間使厚賂末
杯然末杯旣思報其舊恩且因匹磾在外欲襲
奪其國乃間匹磾於涉復辰疾陸眷曰以父兄
而從子弟邪雖一旦有功匹磾獨收之矣涉復
辰等以爲然引軍而還匹磾亦止會疾陸眷病

死匹磾復

一作自

薊奔喪至于右北平末杯宣言

匹磾將篡出軍擊敗之末杯遂害涉復辰及其子弟黨與二百餘人自立爲單于及王浚敗匹磾領幽州刺史劉琨自并州依之復與匹磾結盟俱討石勒匹磾復爲末杯所敗士衆離散懼琨圖已遂害之於是晉人離散矣匹磾不能自固北依邵續末杯又攻敗之匹磾被瘡謂續曰吾夷狄慕義以至破家君若不忘舊約與吾進討君之惠也續曰賴公威德續得效節今公有

難豈敢不俱遂并力追末杯斬獲畧盡又令文鴟北討末杯弟於薊城及還去城八十里聞續已沒衆懼而散復爲石季龍所遮文鴟以其親兵數百人力戰破之始得入城季龍復抄城下文鴟登城臨見欲出擊之匹磾不許文鴟曰我以勇聞故百姓杖我見人被畧而不救非丈夫也令衆失望誰復爲我致死乎遂將北士數十騎出戰殺賊甚多遇馬乏伏不能起季龍呼曰大兄與我俱是我狄久望共同天下違願今日

樂正果元 卷之一
相見何故復戰請釋杖文鳩罵曰汝爲寇虐久
應合死吾兄不用吾計故今汝得致此吾寧死
不爲汝擒遂下馬苦戰槩折執刀力戰不已季
龍軍四面解馬羅披自鄣前提文鳩文鳩戰自
辰至申力極而後被執城內大慙匹磾欲單騎
歸朝續弟樂安內史泊勒兵不許泊復欲執臺
使王英送於季龍匹磾正色責之曰卿不能遵
兄之志逼吾不得歸朝亦以甚矣復欲執天子
使者我雖胡夷所未聞也因謂英曰匹磾世受

重恩不忘忠孝今日事逼欲歸罪朝廷而見逼
迫忠欸不遂若得假息未死之日心不忘本遂
渡黃河南匹磾著朝服持節賓從出見季龍曰
我受國恩志在滅汝不幸吾國自亂以至於此
旣不能死亦不能爲汝敬也勒及季龍素與匹
磾結爲兄弟季龍起而拜之匹磾到襄國又不
爲勒禮常著朝服持晉節經年國中謀推匹磾
爲主事露被害文鳩亦遇鳩一多死惟末波存
焉及死弟牙立牙死其後從祖就陸眷之孫遼

立自務勿塵以後值晉喪亂自稱位號據有遼西之地而臣御晉人其地西盡幽州東界遼水然所統胡晉可三萬餘家控弦可四五萬騎而與石季龍遞相侵掠連兵不息竟爲季龍所破徙其遺黎數萬家於司雍之地其子蘭復聚兵與季龍爲患久之及石氏之亡末波之子勒鳩集胡羯得萬餘人保在入山自稱趙王附于慕容儁俄爲冉閔所敗徙于繹幕僭卽尊號儁道慕容恪擊之勤懇而降

魏書 竇瑗傳

竇瑗字世珍遼西洛陽人自言本扶風平陵人漢大將軍竇武之曾孫崇爲遼西太守子孫遂家焉曾祖堪慕容氏漁陽太守祖表馮交趾戚周太守入國父閎舉秀才舉卒普泰初瑗啓以身階級爲父請贖詔贈征虜將軍平州刺史瑗爲御史轉奉朝請兼太常博士爲太原王爾朱榮所知遂表留瑗爲北道大行臺左丞以軍功賜爵陽洛男除員外散騎常侍封穀昌男因從

榮東討葛榮事平封容城縣開國伯食邑五百
 戶除征虜將軍通直散騎常侍仍左丞乞以容
 城伯讓兄叔珍詔聽以新昌男轉授之叔珍由
 是位至太山太守爾朱世隆等立長廣王曄為
 主南赴洛陽至東郭外世隆等遣瑗奏廢之瑗
 執鞭獨入禁內奏曰天人之望皆在廣陵願行
 堯舜之事曄遂禪焉由是除征南將軍金紫光
 祿大夫敷奏侃然前廢帝甚重之出帝時為廷
 尉卿天平中除鎮東將軍金紫光祿大夫尋除

廣宗太守有清白稱轉中山太守加征東將軍
 聲譽甚美為吏民所懷授使持節本將軍平州
 刺史在州政如治郡又為齊獻武王丞相府右
 長史除太宗正卿尋加衛將軍宗室以其寒士
 相與輕之瑗按法推治無所顧避官雖通顯貧
 窘如初領本州大中正以本官兼廷尉卿卒官
 贈本將軍太僕卿濟州刺史諡曰明
按責瑗封新昌男新昌故縣地也後齊始併入肥如是瑗之為縣人固確有可指也

後周書

怡峯傳

怡峯字景阜遼西人本姓默台因避難改焉高祖寬燕遼西郡守魏道武時率戶歸朝拜羽真賜爵長蛇公會祖文冀州刺史峯少從征以驍勇聞永安中假龍驤將軍爲都將從賀拔岳討万俟醜奴以功受給事中明威將軍轉征虜將軍都督賜爵蒲陰縣男及岳被害峯與趙貴等同謀翊戴太祖進爵爲伯時原州刺史史歸猶爲侯莫陳悅守太祖令峯與侯莫陳崇討擒之及齊神武與魏孝武帝構隙帝頻勅太祖簡銳

卒入衛京邑太祖乃令峯與都督趙貴等率輕騎赴洛陽至潼關值魏孝武西遷峯卽從太祖拔回洛復潼關拜安東將軍華州刺史尋轉大都督討曹泥有功進爵華陽縣公邑一千戶大統二年從太祖破竇泰于小關還拜散騎常侍車騎大將軍儀同三司又從復弘農破沙苑進爵樂陵郡公仍與元季海獨孤信復洛陽率奇兵至成臯入其郭收其戶口而還東魏遣行臺任祥率步騎萬餘攻潁川峯復以輕騎五百邀

擊大破之自是威名轉盛加授開府儀同三司
 東魏圍洛陽峯與季海守金墉太祖至圍解卽
 與東魏戰於河橋時峯爲右軍不利與李遠先
 還太祖因此班師詔原其罪拜東西北三夏州
 諸軍事夏州刺史後與於謹討劉平伏從解玉
 璧圍平栢谷塢並有功涼州刺史宇文和反
 峯與于謹討之十五年東魏圍潁川峯與趙貴
 赴援至南陽遇疾卒年五十峯沉毅有膽畧得
 士卒心當時號爲驍將贈華州刺史諡曰襄威

子昂嗣官至開府儀同三司朝廷追錄峯功封
 昂鄭國公昂弟光少以峯勲賜爵平安縣侯起
 家員外散騎常侍累遷司土中大夫左武伯出
 爲汾涇幽三州刺史加開府儀同三司進爵龍
 河縣公光弟春少知名歷官吏部下大夫儀同
 三司峯本黠台裔邑旣爲黠台故封當並錄之
 且峯子封安平侯安平亦邑故封固爲邑
 人不
 妄也

唐書

田弘正字安道父廷玠尚儒學不樂軍旅與承

樂亭縣志 卷之十一
嗣爲從昆弟仕爲平舒丞遷樂壽清池東城河
間四縣令以治稱遷滄州刺史李寶臣朱滔與
承嗣不協合兵圍滄州廷玠固守連年食雖盡
無叛者朝廷嘉其節徙相州承嗣盜磁相廷玠
無所回染及悅代立忌廷玠之正召爲節度副
使廷玠至讓悅曰而承伯父續業當守朝廷法
度以保富貴何苦與恒鄆爲叛臣自兵興來叛
天子能完宗族者誰邪而志不悛盍殺我無令
我見田氏血污人刃也遂稱疾不出悅過謝之

杜門不納憤而卒弘正幼通兵法善騎射承嗣
愛之以爲必興吾宗名之曰興季安時爲衙內
兵馬使同節度副使封沂國公季安侈汰殺罰
弘正從容規切軍中賴之翕然歸重季安內忌
出爲臨清鎮將欲因罪誅之弘正陽痺瘖卧家
不出乃免季安死子懷諫襲節度召還舊職懷
諫委政于家奴蔣士則措置不平衆怒咸曰兵
馬使吾師也牙兵卽詣其家迎之弘正拒不納
衆譁于門弘正出衆拜之脅還府弘正頓於地

樂亭縣志 卷之十一
度不免卽令于軍曰爾屬不以吾不肖使主軍
今與公等約能聽命否皆曰惟公命因曰吾欲
守天子法舉六州版籍請吏于朝苟天子未命
敢有請吾旗節者死殺人及掠人者死皆曰諾
遂到府殺士則及支黨十餘人於是圖魏博相
衛貝澶之地籍其人以獻不敢署僚屬而待王
官先時諸將出屯質妻子里民不得相往來弘
正悉除其禁聽民通饋謝慶吊服玩僭侈者卽
日撒毀之承嗣時正寢華顯弘正避不敢居更

就採訪使堂皇聽事幽恒鄆蔡大患遣客鐫說
鈎染弘正皆拒遣之憲宗美其誠詔檢校工部
尚書充魏博節度使又遣司封郎中知制誥裴
度宣慰資其軍錢五百萬緡六州民給復一年
赦見囚存問高年惇獨廢疾不能自存者度明
辯具陳朝廷厚意弘正不覺自失乃深相結納
奉上益謹復請度徧行其部宣示天子恩詔因
令節度僉謀布衣崔權奉表陳謝且言天寶以
來山東輿壤化爲戎墟官封世襲刑賞自出國

家舍垢垂六十年臣若假天之齡奉陛下宸算
冀道揚太和洗濯僞風然後退歸邱園避賢者
路死不恨制詔褒答且賜今名錫與踵塗天子
討蔡弘正遣子布以兵三千進戰數有功李師
道疑其襲已不敢顯助蔡故元濟失援王師得
致誅焉王承宗叛詔弘正以全師壓境破其衆
南宮承宗懇窮歸于弘正弘正表諸朝遂獻德
棣二州以謝納二子爲質俄而李師道拒命詔
弘正與宣武等五節度兵進討弘正自楊劉渡

河距鄆四十里堅壁師道大將劉悟率精兵屯
河東戰陽穀再遇再北斬萬餘級賊勢蹙悟乃
反兵斬師道首詣弘正降取十有二州以獻初
悟旣平賊大張飲軍中凡三日設角觝戲引魏
博使至廷以爲歡悟盱衡攘臂助其決坐中皆
憚悟有白弘正者弘正曰鄆士疲於戰瘡者未
起悟當卹亡弔之慰士大夫心奈何取快目前
邪吾奉詔按軍伺悟去就今知其無能爲也旣
而詔悟爲義成軍節度使狼狽上道時稱知悟

之明以功加弘正檢校司徒同中書門下平章
事是歲來朝對麟德殿眷勞殊等引見僚佐將
校二百餘人皆有頒賜進兼侍中實封戶三百
擢其兄融爲太子賓客東都留司弘正數上表
因請留闕下帝勞曰昨韓弘以疾辭不就軍朕
旣從之矣今卿復爾我不應違但魏人樂卿之
政四隣畏卿之威爲朕長城又安用辭弘正遂
還常欲變山東承襲舊風故悉遣子姓仕朝廷
帝皆擢任之朱紫滿門榮冠當時穆宗立王承

元以成德軍請帥帝詔弘正兼中書令爲節度
使弘正以新與鎮人戰有父兄怨取魏兵三千
自衛入其軍時天子賜錢一百萬緡不時至軍
有怨言弘正親加撫諭乃安仍請留魏兵爲紀
綱以持衆心度支崔俊各其廩沮郤之長慶元
年七月歸衛卒於魏是月軍亂并家屬將吏三
百餘人皆遇害年五十八帝聞震悼冊贈太尉
諡曰忠愍弘正幼孤事融甚謹軍中嘗分曹習
射弘正注矢連中融退怒扶之故當季安猜暴

時能自全及爲軍中推迫融不悅曰爾竟不自
晦取禍之道也朝廷知其友愛詔拜相州刺史
賜金紫弘正性忠孝好功名起樓聚書萬餘卷
通春秋左氏與賓屬講論終日客爲著沂公史
例行於世弘正子布羣牟布字敦禮幼機悟弘
正戍臨清布知季安且危密白父請以衆歸朝
弘正奇之及得魏使布總親兵王師誅蔡以軍
隸嚴綬屯唐州帝以布大臣子或有罪且撓法
弘正請以董曉代而士卒愛布願留帝乃止凡

十八戰破陵雲柵下郾城以功授御史中丞裴
度輕出觀兵沱口賊將董重質以奇兵掩擊布
伏騎數百突出薄之諸軍繼至賊驚引還蔡平
入爲左金吾衛將軍諫官嘗論事帝前同列將
麾郤之布止曰使天子容直臣毋輕進弘正徙
成德以布爲河陽節度使父子同日受命時韓
弘與子公武亦皆領節度而天下以忠義多田
氏布所至必省冗將募戰卒寬賦勸穡人皆安
之長慶初徙涇原弘正遇害魏博節度使李愬

病不能軍公卿議以魏強而鎮弱且魏人素德
弘正以布之賢而世其官可以成功穆宗遽召
布解纒拜檢校工部尚書魏博節度使乘傳以
行布號泣固辭不聽乃出仗樂與妻子賓客訣
曰吾不還矣未至魏三十里跣行披髮號泣而
入居聖室屏節旄凡將士老者兄事之祿奉月
百萬一不入私門又發家錢十餘萬緡頒士卒
以牙將史憲誠出麾下可任乃委以精銳時中
人屢趨戰而度支饋餉不繼布輒以六州租賦

給軍引兵三萬進屯南宮破賊二壘于是朱克
融據幽州與王廷湊唇齒河朔三鎮舊連衡傑
驚自私而憲誠蓄異志陰欲乘釁又魏軍驕憚
格戰會大雪師寒糧乏軍中謗曰他日用兵團
粒米盡仰朝廷今六州刮肉與鎮冀甫死生雖
尚書瘠已肥國魏人何罪憲誠得聞因以搖亂
會有詔分布軍合李光顏救深州兵怒不肯東
衆遂潰皆歸憲誠唯中軍不動布以中軍還魏
明日會諸將議事衆譁曰公能行河朔舊事則

生死從公不然不可以戰布度衆且亂嘆曰功
無成矣卽爲書謝帝曰臣觀衆意終且負國臣
無功不敢忘死願速救元翼母使忠臣義士塗
炭於河朔哭授其從事李石訖乃入至几筵引
刀刺心曰上以謝君父下以示三軍言訖而絕
年三十八贈尚書右僕射諡曰孝子鑑宣宗時
歷銀州刺史坐以私鎧易邊馬論死宰相崔鉉
奏布死節於國可貸鑑以勸忠烈故貶爲州司
馬羣會昌中歷州刺史坐賊且抵死兄肇聞

之不食卒宰相李德裕奏漢河間人尹次頴川
人史玉坐殺人當死次兄初玉母渾詣官請代
因緼物故于是皆赦其罪于是武宗詔滅死一
等牟寬厚明吏治爲神策大將軍開成初鹽州
刺史王宰夫羗人之和詔牟代之累遷鄜坊節
度使再徙天平三爲武寧一爲靈武軍官至檢
校尚書左僕射卒諸子皆有方面功以忠義爲

當世所高

按弘正父廷玠與承嗣從昆弟同爲
盧龍人錄弘正而不及承嗣者忠義

之士異于跋

扈方鎮耳

陽惠元年州人以趨勇事平盧軍從田神功李忠臣浮海入清州詔以兵隸神策爲京西兵馬使鎮奉天德宗初立稍繩諸節度跋扈者于是李正己屯曹州田悅增河上兵河南大擾詔移兵萬二千戍關東帝御望春樓誓師勞遣諸將酒至神策將士不敢飲帝問故惠元曰初發奉天臣之帥張巨濟與衆約是役也不立功毋飲酒臣不敢食其言旣行有饋于道惟惠元軍瓶罍不發帝吞嘆不已璽書慰勞俄以兵三千會

諸將擊田悅戰御河奪二橋惠元功多以兵屬李懷光及朱泚反自河朔赴難解奉天圍加檢校工部尚書攝貝州刺史詔惠元與神策行營節度使李晟鄜坊節度使李建徽及懷光聯營便橋晟知懷光且叛移屯東橋翰林學士陸贄請移惠元建徽走奉天懷光遣將冉宗馳騎追及于好畤惠元披髮呼天血流出背袒裼戰而死二子晟嵩皆遇害建徽獨免詔贈惠元尚書左僕射晟殿中監嵩邠州刺史少子旻字公素

惠元之死被八創墮井以救得免歷邢州刺史
盧從史既縛潞軍潰驍卒五千從史嘗以子視
者奔於旻旻閉城不納衆皆哭曰奴失帥今公
有完城又度支錢百萬在府少賜之爲表天子
求旌節旻開諭禍福遣之衆感悟遂還軍憲宗
嘉之遷易州刺史王師討吳元濟以唐州刺史
提兵深入三百里薄申州拔外郛殘其垣以功
加御史中丞容州西原蠻反授本州經畧招討
使擊定之進御史大夫卒贈左散騎常侍

字上珪平州盧龍人曾祖代選爲魯城令
安祿山反率縣人拒戰死之祖光濟事平盧龍
節度使侯希逸爲牙將每戰得攻魯城者必手
屠之歷左贊善大夫從李洎以徐州歸天子父
懷義通書記系檢校工部尚書天德西城防禦
使以徙城事不爲宰相李吉甫所助以憂死寶
籍蔭爲千牛備身天平節度使殷有嘗爲懷義
參軍寶從之爲部將會昌時選方鎮才校入宿
衛與高駉皆隸右神策軍歷良原鎮使以善擊

球俱補軍將駢以兄事實寶寶疆毅未嘗詘意于人官不進自請以球見武宗稱其能擢金吾將軍以球喪一目進檢校工部尚書涇原節度使務耕種聚糧二十萬斛號良將黃巢據宣歙徒寶鎮海軍節度兼南面招討使僖宗入蜀加檢校司空時羣盜所在盤結寶練卒自守發杭州兵戍縣鎮判八都中和二年進同中書門下平章事兼天下租庸副使封汝南郡王寶和裕喜接士以京師賊陷將赴難益募兵號後樓都實

子璵統後樓都孱不能馭軍部伍橫肆寶亦稍惑聲色不卹事初鎮海將張郁以擊球事實寶光啟初劇賊剽崑山寶遣郁領兵三百戍海上郁醉而叛寶遣將拓跋從討定之郁保常熟因攻常州刺史劉革迎降寶遣將丁從實督兵攻之郁走海陵從實遂據常州及董昌徙義勝軍節度使寶承制擢杭州都將錢鏐領州事高駢領鹽鐵辟寶子佶為支使寶亦表駢從子在幕府駢為都統寢久不禮寶寶啣之帝在蜀淮南絕

貢賦謾言道浙西爲寶剽阻帝知其誣不直駢
自是顯隙駢出屯東塘約西定京師遣人請會
金山謀執寶寶答曰平時且不聞境上會况上
蒙塵宗廟焚辱寧高會時耶我非李康不能爲
人作功 欺朝廷也駢遣人切讓寶亦詬絕之
會部將劉浩刁穎與度支催勘使太子左庶子
薛朗叛寶方寢外兵格鬪火照城中寶自責陽
門出奔常州依丁從實召後樓都無一士至者
錢鏐遣杜稜徐及攻薛朗稜子建徽攻從實聲

言迎寶遂圍常州從實奔海陵鏐具櫜韉迎寶
舍樟亭未幾殺之年七十四贈太保

名臣

政事武勳忠節統錄在內

夫人以本末兼濟者爲上則名臣其選也顧臣
之誼幸則宣力效猷循良著績不幸則奮志疆
場致命遂志非其品之差所遇不同耳古人有
言曰願爲良臣毋爲忠臣其道一也爰是比而
列之總爲一冊初非敢輕節義而尚事功也

金

李元璋字寶臣元道弟少穎悟每千言一覽成
 誦未弱冠登正隆元年律科上第任西北路招
 討有能名陞左三品校法歷石城簿豐潤丞夏
 津令泰和間訪山東賢能舉官第一章宗特旨
 宣問璋奏正紀綱近忠直遠邪佞數事上嘉納
 之擢吏部尚書官至少中大夫上護軍府隴西
 郡開國侯食邑二千戶實封一百戶賜紫金魚
 袋元璋事父母甚謹公餘拱立父側命退乃退
 溫清觀省曲盡其禮鄉邦稱之兄元道詞賦進

士仕至節度判官

州志元璋四子邦基榛子鎮
 監酒邦秀忠顯校尉邦彥平

州觀察推官邦獻以文字科出身授元平灤路
 副都總管府志孫緯警使纓千戶綱惠州同知
 經元帥府鎮撫繪敦武校尉 按舊志正隆間
 樂亭猶未置統屬馬城則馬城人宜志也後既
 析治而璋之子若孫
 分隸馬城故不載

元

張昇字伯高其先定州人徙平州樂亭幼警
 敏過人既長力學工文辭至元二十九年薦授
 將仕郎翰林國史院編修官預修世祖實錄陞
 應奉翰林文字尋陞修撰歷興文署令遷太常

博士成宗崩大臣承中旨議奉徽號饗宗廟昇
曰在典故凡有事於宗廟必書嗣皇帝名今將
何書議遂寢武宗卽位議躬祀禮昇據經引古
參酌時宜以對帝嘉納之至大初改太常寺爲
太常禮儀院郎除昇爲判官久之外補知汝寧
府民有告寄束書於其家者踰三年取閱有禁
書一編且記里中大家姓名於上昇亟呼吏焚
其書曰妄言誣民且再更赦矣勿論同列懼皆
引起旣而事聞廷議謂昇脫姦宄遣使窮問卒

無跡可指乃坐奪俸二月歷江西行省左右司
郎中除紹興路總管大德至大間越大饑疫民
死者殆半稅鹽課責吏胥代納吏並緣爲姦昇
爲證於簿籍白行省蠲之前守有爲江浙行省
參知政事者爭代者祿米有隙欲內之罪移平
江歲輸海運糧布囊三萬俾紹興製如數民苦
之更數守謂歲例如此置弗問昇言麻非越土
所生海漕實吳郡事于越無與章上卒罷之歷
湖北道廉訪使江南行臺治書侍御史召爲參

議中書省事改樞密院判官尋復中書參議至
治二年又出爲河東道廉訪使未行拜治書侍
御史明年出爲淮西道廉訪使泰定二年拜陝
西行省參知政事加中奉大夫尋遷遼東道廉
訪使屬永平大水民多捐瘠昇請發海道糧十
八萬石鈔五萬緡以賑饑民且蠲其歲賦朝廷
從之民得全活者衆明年召拜侍御史天歷初
出爲山東道廉訪使踰年召爲太禧院副使兼
奉質神御殿事除河南省左丞復遷淮西道廉

訪使上書乞致仕至順二年復起爲集賢侍講
學士文宗眷待甚隆元統元年順帝卽位首詔
在廷者艾訪問治道昇條上時所宜先者十事
尋兼經筵官廷試進士特命昇讀卷事已告省
先墓明年以奎章閣大學士資善大夫知經筵
事召賜上遵趣就職昇以疾辭命郡月給祿半
以終其身至正元年卒年八十一贈資德大夫
河南等處行中書省左丞諡文憲

王 統世居樂亭剛毅有才力金末爲裨將從

帥出鎮高麗東方以寧

王仲仁統子元初從奇渥氏擊信安兒有功授左監軍取金沭蔡擢先鋒西蜀事平賜璽書銀符中統初陞大都大同真定等路奧魯都總管撫將士恩威兼至卒贈鎮國上將軍長子珪另傳仲子瑣授本路鎮撫不願出仕

王珪仲仁長子襲官從兵四川至元二十年加授武畧將軍商州知州兼諸軍事接人謙抑政事秩秩有條在任最久商人德之見陝西名

宦志至元末陞宣命武節將軍成都路總管官治中兼奧魯等諸軍事子禡剛帶金符千夫長武畧將軍

王伯川仲仁孫瑣子以祖廕授文階判懿州給散軍餉無私陞大都路豐潤縣尹所至頗有政聲

王环統孫至元間任興元路千夫長武畧將軍歿於王事

王祥环子前至元間從父至江淮發九矢斃

九人以廕補忠顯校尉數立奇功晉武義將軍
擢武畧將軍乃牙叛祥討平之加武節將軍旣
而曰知足不辱知止不殆道也累章求退詔許
之蕭然野處訓誨子弟大德間卒贈金吾上將
軍征行兵馬都元帥

孟國寶下莊人中統初仕至太守弟國祥中統
間仕與元軍判官俱有能聲

齊 秦縣南古城人至正間任登豐主簿興學
勸農平獄均徭九年政成民爲立碑頌之

明

李 樂大家坨社人洪武中貢入太學永樂間
拜監察御史有激揚聲遷山東按察司副使卒
後有行部者至詢樂得其子茂貧甚捐俸助之
俾就塾則其品望可見矣茂正統間貢仕至高
郵州知州茂子珏成化間貢任州判官

溫 原洪武間薦辟入仕官至都察院左僉都
御史有聲載明一統志

史 怡永樂甲申貢入太學時遼軍亂入關怡

守城有功授戶部郎中歷任江西左參政載明
一統志

李霖在城社人正統丁卯舉人授柘城令考
績贈父昇如其官尋陞衢州通判義方訓諸子
復以子貴封主事長子宗夏弘治乙卯舉人任
邠州學正仲子宗商字尚質登弘治庚戌進士
性沉靜寡言笑嗜學授戶部主事歷員外郎中
陞太僕寺少卿以忤當道謫兩淮運同致仕歸
爲人有操守始終如一

張泰在城社人景泰間貢人太學授桐鄉縣
知縣時桐鄉新置諸所未備泰至經營三載六
事修舉民不告勞俗多水火葬泰禁之購地置
義塚他如闢茅塞覈兼井招商賈皆可紀焉九
年薦有成績陞開封通判見桐鄉志

盧敬其先山陽人徙定州元時又徙樂亭高
祖和甫致和間聞于鄉父斌生敬嗜學領成化
乙酉鄉薦授兵部司務侃侃不阿冰操凜著五
載攷最進階嘗語其子梁棐輩曰輩有營利者

樂亭縣志 卷之十一
爲子孫計耳竟何益吾厄一第子孫必有第者
若曹勉之後孫耿麒果登進士丁外艱卒家業
蕭然

牛 本景泰丙子舉人授九江同知素性謙恭
涖官廉慎有惠政九年將代郡人赴部保留擢
本府知府

盧耿麒字仁淑梁長子少聰穎過目成誦年十
三補弟子員弱冠登嘉靖癸未進士授工部虞
衡司主事歷員外郎陝西僉事屯田甘肅給戍

牛種丁內艱起補江西僉事洗數沉寃陞山西
參議比駐雲中當外叛甫平恩威並著卽強藩
亦斂戢防邊有運籌功建修五堡世廟賜綸音
有巨鎮賴以永安之褒復丁外艱起補山東參
議陞山西副使以疾卒年四十有五麒貌玉立
性直方篤孝友父產悉讓二弟所居庭前無旋
馬地尤博羣書詩造唐語著藍山集涖官所至
以明敏聞然議論辨博長官前亦不少遜終以
此取忌云孫光裕前潘令纂修邑志與輯校焉

李光啟其先李卜當洪武間戍陝西平魯衛有
功世襲百戶光啟性忠孝有才幹累陞京營都
指揮使贈其先爲鎮國將軍歸祭先塋爲樹碑
給族人衣食陞宣鎮葛峪參將嘉靖丙戌敵數
突入侵苦居人啟憤焉一日警至率所部兵疾
馳圖殲之未及爲陣敵四至大呼殺入啟被縛
引去困餓不得死因給敵我爲帥弟引我亭障
下當有贖者敵果引至亭障下啟罵曰爾宜殺
我我非不肯死慮中國人疑我真降爾徒負辱

國大罪幸毋贖我敵大怒遂支解之事聞詔立
祠春秋祀焉見宣鎮忠烈傳

王好學臣長子領嘉靖庚子鄉薦嘗試南宮父
卒痛爲肖像及令陳留蠲逋修學擢刺澤州佐
歸德在在多善政後轉太原請治宗室驕橫檄
撫石州爲畫戰守之策歷陞戶部郎中督餉昌
平時內使往來好學正色戢之陞楚雄知府乞
休歸著有遊藝集

王好問好學弟生有異兆弱冠抱當世志舉於

鄉卽郤餽金登嘉靖庚戌進士授太常博士時
分宜當國韜晦自守久之擢御史劾巨璫不法
事嘉靖末出按秦晉上興革便宜數事却諸祥
瑞不以聞穆宗卽位益多獻替而重孝思止行
幸查內庫并劾近侍謀典兵柄諸疏皆極剴切
遷大理丞歷通政使晉工部侍郎轉刑戶二部
擢南京右都御史遷南京戶部尚書憂時思職
無一少替南中米涌貴例當改折問遽發倉粟
而後以聞詔賑江南不待移文發賑曰奈何稽

朝廷意以忍饑民有古大臣風先是爲卿貳時
卽抗疏求退至是章屢上始得優允歸數月卒
賜祭諭葬贈太子少保好問天性好靜自奉淡
泊立朝虔恭動由矩矱謙抑折節若不勝衣而
內實毅然不可奪鄉誼族範遐邇共孚所著春
煦軒集三十六卷子渾然另傳從子順潮任宜
川縣丞有才幹

王渾然好問子事親極孝閉戶讀書舉萬曆辛
卯鄉薦授中府都事歷刑部郎中時南康守吳

寶因稅璫李道誣奏被逮公問擬還職上怒罰
俸三月吳守得以從輕徼生光妖言事東省無
行老生流言彼中有聞者公恐蔓延無辜解發
山東撫按鞫問保全大姓甚夥陞馬湖知府革
漆戶板稅修學繕城奢酋爭殺片言立解總督
王象乾題擢遵義兵備副使下議時疏乞骸骨
歸尋卒窮約至甚十年後夙債始完著有蜀遊
草川民肖像祀之

張國瑞萬歷進士任陝西布政使崇禎五年崇

祀鄉賢

本朝

張一躍順治拔貢歷任紹陽萬載開化黃安令
擢知黃平州悉有循聲以親老歸性孝友父應
登尻下患毒瀕死一躍口吮膿血殆盡而愈以
兩兄子女多累一弟尚幼悉出已產讓之任紹
陽時丁母艱湖撫以一躍撫綏有術欲題請奪
情躍叩頭流血哀懇以免康熙五十三年祀鄉
賢載畿輔志

陳性天順治舉人應省試時於旅店得遺金不
開緘視閱九日失金人號泣來原封授之後授
宜川令地與米脂接壤閩賊亂後人民凋敝撫
字勤勞六七年間境內大治去官日邑人建清
風閣以志遺愛康熙五十三年祀鄉賢載畿輔
志

姚協于商家賑社人熙長子登康熙丙戌進士
任會稽令廉以勵己和以處人勢豪奸吏咸共
畏懷涖任四載修黉宮設義學飭城池築石塘

善政多可紀去官日士民詣憲請留公固辭得
免邑人慕之崇祀名宦

李 蘭字汀倩號西園拔長子蚤失怙恃奉繼
母至孝家貧無措率諸弟芸葳等力學不倦康
熙丁酉科由廩膳領順天鄉薦第一戊戌成進
士選庶常授翰林院檢討飲食服用如布衣時
且勤于館職所撰詩文無不穩中體裁尋擢戶
科給事中諫議能持大體

主眷特隆外補江西督糧副使遷湖南按察使歷江

西按察使布政使改安徽布政使所至威望嚴
重正己率屬吏無容奸民皆安枕年四十有五
卒於官蘭學問淵邃崇尚雅正雍正甲辰科典
試江南閱癸卯甲辰兩次分校南宮所得士皆
名俊任江南時定議開江浦朱家山河吳人至
今賴之卒後廕子掖垣官光祿大官正奉

命督理通州倉務三年陞大理寺丞現任湖南桂楊
州刺史云

儒學

儒之重於天下也尚已其大者明道覺世遞衍
薪傳次則著述等身羽翼經傳此皆風教所由
開人文所由振也若夫束修自愛採藻摘詞窮
爲射鮒之泉達卽鳴岡之鳳亦彬彬文學之選
也樂邑毓秀海濱向若觀瀾定多藻思卽士風
朴茂不尚才華而霧豹一斑吉光片羽已足覘
儒雅先聲矣並著於篇

金

李 杭天會初舉進士時平灤兵甫定民未知

學杭擇地建文廟行釋奠禮以振興學校維持
風俗爲已任仕至州刺史有聲於時

鮮于仲權其先遼東人遠祖輔仕魏任漁陽太

守有功封亭侯

稽魏書本文止稱封亭侯舊後
志作封樂亭侯恐不確刪之

還本鎮子孫遂家漁陽北平間仲權世居樂亭

少博學工古文辭登明昌間進士先是文廟朔

自天會無黌舍規模粗具仲權慨然謀鼎建邑

人相勸興置學館邑之人物稱盛自茲始仲權

爲人重道義有節槩弟仲畢官昭信校尉

齊守素陶之後兄守澤官昭信校尉守信業詞
賦舉鄉進士未仕卒弟守約明經教訓鄉里
裴宗智號秀巖居士明昌間人善書篆張守謙
號天倪老人貞祐間人善屬文並隱居不仕有
古逸民風

元

楊紹先蔡家庄人登至正中進士授集賢院司
直學士德行文章爲世推重嘗捐書三百六十
三部於本縣學備邑弟子員及民間俊秀諷誦

子塾仕至濟南路厭次縣尹善篆書不墜家聲

見邑廟學碑云

按州志載紹先子有道捐書於灤學州學正秦本紀之舊志失

載應為附傳

明

宋弘道少值元季隱居不仕講授鄉里家業泊如恬不為意後明興設科登洪武乙丑進士拜監察御史有聲尋遷河南左參政以衰老乞歸槩書衣裝惟一輓輅而已後起左僉都御史未就年七十餘卒於家

郁 瑄其先崑山人祖彥忠明初任潮州府同

知徙樂亭父昌歲貢生瑄勤學力行天順壬午領鄉薦任知縣仲子昕歲貢任陵縣知縣季子時歲貢任儀封教諭居鄉長厚不浮時子從舜聰敏好學聲名籍甚歲貢授訓導一門絃誦人以為難云

李宗儒霖季子諄謹誠懇勤勵好學時伯仲間相繼登科第儒溫恭抑抑略無矜炫色貢入太學授林縣丞未幾即解組歸益禔躬為鄉邑望

者幾四十年嘉靖間扁其名于旌善亭年九十
七卒子汝紹官太醫院

蕭雲漢富長子博學工古文詞貢入太學授大
同府通判膺薦舉陞河東運同遂乞歸居鄉以
文史自娛邑之銘碣多出其手子馨春任濬縣
訓發春任磁州訓達春任芮城簿孫連茹連璧
有聲鄉國學

本朝

姚采延嗣子康熙拔貢授內黃教諭勤於訓

誨多所成就擢國子監學正尤以振興文教爲
兢兢遷刑部司務轉工部主事以親老假歸侍
膳承歡終養盡志越十年起補授工部員外郎
嘗監廠務綜覈嚴謹吏胥肅然

姚熙延嗣次子康熙戊寅拔貢性穎悟能文
章閉戶讀書足不履市惟手一編以課生徒後
進多所造就教四子以義方長協于成丙戌進
士次敷于明經貢士次起陶次納于俱博士弟
子員崇祀鄉賢

劉可興馮家哨社人性孝友視躬有矩獲居鄉
足不履公庭館徒授業泊如也督學吳襄廉其
行以優生貢入太學四子皆列膠庠縣令來埏
記其行

孝義

孝者五常之本百行之原也資以事君則忠資
以事長則弟思貽父母令名則爲善必果恐貽
父母惡名則爲不善必不果蓋自庸行之常極
而至于明天察地無非孝道之所推暨人亦求

盡乎孝而已矣餘皆流裔也此編以孝爲主凡
諸懿徽悉以義字該之

明

韓孝子舊志失名居鄉廉讓與人無競竭力以
奉親惟恐不逮洪武間題旌

田 紳商家堰社人邑弟子員景泰初以親老
陳情於督學使者求侍養以孝聞父歿哀毀踰
禮旣葬廬於墓側三年自跣足負土母終亦如
之有司請旌未果百年來封土巍然可望數里

王 臣在城社人父茂有孝行臣善楷書郡辟
爲從事有罪人通賂求追臣指天自誓郡守賢
之每疑獄輒召與議能白人寃亡何奉母柩歸
里山水暴至舟幾覆臣撫柩悲號竟無恙若神
助焉有客懷二十金欲糴粟入市遺金哭之悲
臣憐助之年四十七未舉子往禱泰山夢神告
曰以吾二子與爾踰年生太守好學又三年生
尚書好問若與夢符以二子貴累贈至南京戶
部尚書

蕭 富千金社人性醇厚少孤事母孝母卒富
供王事不在側歸而痛極嘔血終身言及淚泣
泣下仲兄積私財富泊然絕不置齒頰竟以祖
居讓伯仲而自居他所嘗爲府吏廉而有陰德
旣歸省卽隱不仕嘉靖丁酉大饑鄉人求貸乃
轉貸負累代償不較也他凡撫孤睦族重義輕
利類此始艱嗣後連舉四子以子雲漢貴詔贈
如其官

張自鎬賦饒屯人萬曆戊寅年貢入太學素持

樂亭縣志 卷之一
謹事親至孝母性僻能曲意承順久亦感悟邑
令陳留李公廉其賢延訓其子毫無干請比齋
志以歿鄉人悼焉

劉文煥字世英幼孤事母至孝妻盧氏亦孝於
姑姑病顛天請代冬著單衣者三年病果痊及
姑歿欲廬墓文煥止之曰此爲子事也自廬墓
三年每日舉土三次墳可望數里嘗鑿井於墓
旁汲以自爨不數尺泉水湧出人號爲孝泉云
馮恩孚馮家哨社人嘉靖壬子貢入太學事親

至孝曲爲承順有老萊風父飲親故家雖隆冬
深夜必俟父還然後寢母性嚴刻字畧不違意
待人謙和無忤未仕卒

本朝

姚延嗣字振公天性孝友執親喪哀毀踰禮未
四十鬚髮皆白有舊家子以遭難鬻於都下輸
金以贖或負債不能償者輒焚其券待人至誠
教子弟以正心術尚實學爲要

吳班字彬如號朗山領康熙庚午鄉薦性孝

友最敦義讓幼年家貧冬嘗映雪讀書夏每迅雷耳不聞聲勤誦自若未年三十已為飽學族有姪孫婦新寡為之立嗣撫恤之二十餘年授以產業無德色振興義學先後景從者數百人皆能因材成就其最得薪傳者如方伯李公數人皆所鍾愛然相見時不稍假詞公正性為人矜式類如此初李公公為東床曰此人傑也後果名重當時位至方伯其識力過人又如此名重當時位至方伯

康熙末年命蜀之井研

躬耿介罕所合二年即告歸居鄉以講學明道維持風化為務雍正三年舉郡鄉飲大賓壽至九十餘無疾而終

甯瑄千金社人幼補弟子員乾隆元年

恩賜八品冠帶行已端方居家孝友父母在堂諸兄早亡獨供甘旨備極色養親歿一切喪葬率身任之不以累諸姪至於任恤之誼復極周洽孀嫂中之貧乏者拮据體恤族人自鬻身關外者備金贖之孤寡無倚者悉賴其鞠養焉且輸義

穀以備荒施藥餌以救人善行多可紀云壽八十七歲終

韓 晉字進也父孫邁子世勳大家坨四甲人幼補弟子員賦性溫良居心孝友前隨父任值富貴而不淫後歸桑梓素貧賤而不移命子以立祠堂宗族稱其孝施藥以救疾病鄉黨慕其義身染弱症調劑維殷其子善承父教以優行著二孫俱列膠庠乾隆元年

恩賜八品頂帶壽八十五終

姚敷于康熙戊戌貢入太學性孝友色養承歡務得父母心日嘗閉戶課讀不干外事鄉評有盛德長厚之稱邑令沈繼賢重之舉孝廉方正辭不受

馬德盛城北馬家庄人販菜爲生人有至性奉嗣母甚謹母嘗冬月思鮮果冒雪尋供之母病盛在外聞之夜行百五十里抵家親調湯藥事兄如事父每事必稟而後行雖乏財而性喜施嘗代人還官錢贖旗丁皆出自辛苦云康熙二

十六年舉鄉耆

李璿字舒英優行入貢天性孝友二兄俱早沒兄嫂及孤姪無倚璿收養之數十年如一日未嘗有懈諸姪皆賴成名雍正三年舉賢良方正以親老不就

韓世勳大家坵社人增廣生飭廉隅端操守教授生徒以奉甘旨父染痾疾日侍湯藥飲食必親奉三十餘年如一日後因祖塋數世邊灤河被水塌去無遺每仰天椎心曰是子孫之罪也

欲立祠設主貧不能舉終積館金以建之族人咸感其德督學吳襄優其行給匾旌之曰飭躬勵行

王積善住樂邑東街漢軍監生係正藍旗包衣查克散佐領下人事親孝與士信臨財廉其父延相以州同効力河工總河部院于成龍保舉任江南鹽城縣丞卒於官積善年方弱冠號泣奔喪扶柩旋里哀毀骨立安厝後廬墓三年雍正年本旗保舉孝廉以母老侍養辭不就旋

蒙

題請

旌表勅建孝子王積善之坊

卓行

君子之道皆庸行也行庸行而為人所不能及
斯卓矣離庸行以言卓非吾之所謂卓也竟是
編者知一切難能可貴之事皆有生分內所當
盡而未嘗絲毫溢乎其量則所以自待者不苟
而導我以先路者不難步其後塵矣

明

劉甫嵩林兒社人自明初至弘治間六世同
居凡內外婚葬禮義必均俱無後言弘治十二
年巡按御史張黼嘉其賢命知縣田登具禮旌

之

州志作劉本
祥恐係一人

盧梁敬仲子嘉靖五年貢入太學居鄉孝友
有高志與人無競以子耿麒貴封右參議

高漢六世同居伯叔兄弟長少無間言嘉靖
十六年知府劉隅獎之

溫 欽舊鎮庄人質朴篤實平居尚讓絕不與人競亦絕無過忒非遇審編戶徭不至公府既老亦罕至城市惟耕田明農而已貧而好善卓有古人風年百有二歲猶芸踰年卒嘉靖間令匾其名於旌善亭以示勸

王永昌賦饒屯人家富好施能周人急鄉人稱貸有以田廬爲質者久之多負而轉鬻昌卒不與競合計可數千金又嘗捐地爲義塚其輸粟輸金輸工役以佐公家者不勝紀

本朝

李洪燦號培菴其先山後六州人後徙樂亭居焉幼孤能自豎立爲鄉里望又嘗捐金創粟家灣坨石橋里人便之宜川令陳性天紀其事

李本恭字成初洪燦子性誠篤不欺有人託白金數萬鎰權得浮金數千餘悉還之無所利焉遇貧乏能推與不私其財舉鄉飲大賓子拔字彙征幼遊庠序有聲後以父年邁尚行賈濟充間請代之計應責逋債遇貧不能償者悉還其

券濟人至今稱頌後以子蘭貴各

詔贈如其官

趙廷傑力本屯人性慷慨能周人之急邑有死
喪貧不能殮者施與棺槨歷今三十餘年不怠
前郡守縣令各額匾旌之

竇咸臨子金冠人幼補弟子員康熙壬寅年遇
列入貢性醇謹居鄉樂善邑南關外木橋歲久
將壓邑人議甃以石苦費巨莫舉咸臨首先倡
之費錢四萬緡有奇其義舉類此子克昌善體

父志行仁施義更有加焉

李興官東蒿林人學生授縣丞職勿失怙恃
伶仃甚由勤儉起家凡里中婚葬貧不能舉者
求無不應里人德之

附

寓賢

季札去之延陵至今號爲君子鄉管寧邴原避
地遼東清風亮節亦膾炙人口寓賢之繫人景
慕也甚矣邑僻在海濱名賢轍跡罕屈幸而其

樂亭縣志 卷之十一 五
入其事有足稱道者固宜鄭重而記述之

金

齊 陶其先弘正人高祖文及仕鄭州防禦使
後徙石城再徙馬城樂安鎮卽今縣治也兄甫
舉進士未仕卒陶壽昌間監鎮酒務善幹辦金
天會間授明威將軍階三級僕馬萬餘而厭侈
靡崇節儉孝友慈惠動以禮法律身鄉閭翕然
稱之 長子執中官修武校尉仲子允
中忠顯校尉俱恭謹世其行
李元道其先定州人五代時徙馬城縣南居焉

舉進士仕至節度判官 弟元璋登本縣進
士則從本縣書之

元

黃 贊江西臨江人父均道元延祐間求仕京
師留贊江南時贊幼及長聞父再娶居永平乃
往省之則父已沒後母挾貲更嫁居樂亭贊至
求見拒不納贊曰吾來省父不幸父沒幸示墓
所得奉骨歸幸矣忍利遺財邪後母竟不見後
母弟憐之與偕求墓所弗得贊日夜悲苦禱於
神一夕夢一老以杖指葬處曰見片磚卽可得

明日卽其地求之後母弟曰是矣某物可驗啟
棺得父骨歸

明

劉廷宣字化卿號方壺晚號木庵山海衛人後
徙樂亭居焉登萬歷癸丑進士丰神清穎廉直
謹飭策仕儀封勵學校恤鰥寡課農桑勸孝弟
河汜淪治之獲名田幾萬畝民賴以蘇徵賦絕
耗羨訟俱自拘不判牘設保甲法荏苒克靖革
一切無名科派省民鋌不下巨萬擢浙江道御

史彈章不避中貴劾魏忠賢蠹國十四款章由
通政霍惟華與有年誼對使焚云何爲起此大
釁廷宣不先揚左而摧虎喙者幾希耳巡按陝
西未復命轉爲大理丞假歸未半載尋因母老
請終養以大理寺少卿歸甲戌六月病卒

藝術

醫卜小道而術業專精良有功於人世且其保
身知幾之哲類於有道者之所爲若君平之道
人以善韓康之惟恐人知又不得以藝術目之

矣烏可以不誌

明

趙楷邑弟子員幼聰敏得麻衣訣然不欲輕以術售人撫寧翟中丞鵬家居時楷望見輒語人曰翟當重用第不終爾已而果然王司徒好問未遇時意殊鬱鬱楷曰君當清貴可上卿無憂不第後亦果然又自知休咎言如左券稱奇絕云

本朝

任正傳字介菴世授岐黃術至傳尤精其業任醫學訓科施藥濟人全活無算尤急公尚義凡邑有剗建踴躍輸助爲士民先族黨咸矜式之

樂亭縣志卷之十一

列女

隄順殊形鍾靈則一古之賢妃淑媛不專以節
 見也然里巷閨闈含章內美舍節則亦無可見
 故此編所紀貞節為多闡範一條畧存其概勿
 訝其多寡相懸也志列女其目二

貞節

貞女 節孝

烈女 節婦

烈婦

壺範

貞節

女以節見女之不幸也然家道賴以成子職賴以盡緝繡教子則不絕之綫由此熾昌煉衣補天則既斬之宗因而紹續是則未亡人爲不幸者則亡人爲大幸矣甚或膝下無依棺舟永矢逼於強暴奮不顧身同穴有懷捐軀以殉雖所遇各殊其冰霜金石之操均足以動天地而泣鬼神也樂邑閨門之化甲於郡中華門圭竇之家亦多明於大義故志中採錄極詳卽未及旌門而年例已協者亦採輿論核實附載至於但

注

旌表字樣而行實無可見者實緣備案之時記載已闕無憑纂撰要之編氓匹婦終身守志始得此一字之褒慎不容以忽視也惟空谷蘭芳嶺頭松秀而闡幽發潛者遺漏尚多此則採風之所抱愧也噫

明

孫氏在城社民宋昇妻年二十七夫亡家貧二孤在襁氏旦織夜紡以給衣食撫之成立後

二子相繼亡又撫遺孫成立年八十餘卒天順
五年旌表

王 氏時登屯民劉敬妻年二十二夫亡家貧
遺一女誓不再適紆刺自給年六十五卒嘉靖
七年旌表

葛 氏富有屯民党文明妻年十八于歸五月
而夫亡號痛不已母勸慰之氏曰夫死再嫁豈
良婦耶因矢志投繯人覺而救甦者數後防稍

弛竟縊死

畿輔志作
盧氏事同

商 氏邑庠生劉孟絃妻子珠甫三月而孤體
粥不給氏奉姑盡歡撫孤成立人無間言年七
十卒

楊 氏邑庠生盧繼伯妻年十六于歸未再歲
夫沒痛欲俱亡時有娠五月姑李恭人亦孀居
諭曰倘得一子亦可延祀奈何死爲後果生子
閨範甚肅奉姑極孝姑病月餘晝夜扶掖藥必
親嘗乃進及卒哀毀盡禮又善奉庶姑宗族多
强悍欺孤氏誠子勤學補邑弟子員以上三人
不詳世次

王 氏邑庠生汪必相妻年十九夫亡遺孤在襁哀毀骨立投繯柩前救而甦後以紡績事姑姑暑月患癰氏晝夜洗濯敷藥籲天請代果愈逾數歲姑沒家雖貧殯葬如禮歷艱四十餘年如一日萬歷三十一年題旌

本朝

劉 氏楊甲第妻年十八夫亡守節撫遺腹孤成立食餼於庠壽八十九終孫曾繁衍實氏苦節所貽云順治間 題旌

齊 氏邑庠生寧君錫妻年二十五夫亡撫四歲孤守志不奪紡績以事繼姑食貧無怨教子成名登仕籍

詔封恭人雍正年題旌

史 氏邑庠生魏化淳妻年二十四夫亡遺孤三歲甘貧守節訓子成立補邑庠年八十餘卒
趙 氏張應贄妻年二十一夫亡遺孤二歲有富豪欲奪娶之氏以死自誓孝事孀姑撫子成立子又亡撫三歲孫成立艱苦食貧終身無間

年八十一卒

劉氏邑庠生王時衡妻年十夫亡矢節撫孤暨孫成立後孫相繼而亡又撫曾孫宗祧不絕皆氏力也壽九十卒

劉氏黑崖子社民康朝選妻年十九遵孽姪逼姦氏不允爲所害康熙三十九年題旌

高氏賈啟妻年十九夫亡無子或勸之嫁氏誓守節足不踰閭並不歸寧姑患疽氏吮膿奉湯藥數年不怠苦節四十年五十九歲卒

姚氏王三晉妻年二十四夫亡無子家貧茹苦撫繼嗣俾成立補博士弟子苦節四十餘年壽六十九卒

馮氏邑庠生蕭濟妻年二十三夫亡孤始彌月翁亦旋亡欲奪其志者甚衆氏毀容自誓苦守五十年壽七十三卒郡守張朝宗旌之

高氏邑庠生王積蔚妻年十八夫亡遺腹孤俯仰無依氏伶仃撫誨俾成立補弟子員守節六十餘年

姚氏張永康妻年二十三夫亡二子在抱舅
姑旋歿家貧氏竭蹶殯葬如禮以紡績爲生訓
誨二子勗之曰爾父讀書未成今家雖貧吾不
令爾改業者爲爾父手澤計耳後二子俱補邑
庠弟子守節四十年郡守張朝宗旌之

趙氏馮家哨社民賈思福妻年二十三夫亡
無子繼姪爲嗣成立娶媳景氏甫三年繼嗣
又亡遺孫在抱二孀一孤形影相弔姑守節五
十三年婦守節二十九年郡守張朝宗旌其門

曰松栢雙貞

牛氏齊自先妻年二十八夫亡紡織孝養舅
姑生事死葬無不如禮撫育二子成立孫曾遊
泮守節六十餘年五代繞膝人謂苦節之報云
劉氏葛萬里妻年二十四夫卒遺孤四歲家
貧甚籍紡績爲生日多不給或勸之嫁氏曰夫
亡而吾不死者爲葛氏嗣耳吾豈貪生者何再
嫁爲會天大雪房壓氏與孤埋雪中者二日以
救得甦後子長娶媳生孫方在抱子媳相繼亡

氏復籍紡織喂哺之稍長俾就義塾而自甘饑餒後孫璉得補弟子員守節四十三年諸艱備嘗未有苦於此者年六十六卒郡守張朝宗旌之

劉氏王君相妻年二十一夫亡矢節甘貧敬事舅姑辛勤訓子守節三十年

張氏吳宗聖妻年二十三夫亡遺孤三歲俯仰無資藜藿自甘撫孤成立苦節四十餘年

張氏王調元妻年二十七夫亡家貧甚以紡績爲生撫孤成立苦節五十餘年

陳氏邑庠生商雲生妻年二十五夫亡孤幼或勸改適氏以死自誓日勤紡績以事舅姑舅姑歿殯葬如禮撫孤成立苦節四十年

任氏賈升妻年十九夫亡遺孤甫數月矢志守貞撫孤成立守節三十餘年至五十三卒

楊氏石崇玉妻年十八夫亡姑老子幼辛勤鞠養孝慈兼至守節三十餘年

王氏監生賈朝聘妻年二十三夫亡毀容守

節孝養舅姑辛勤誨子守節三十餘年

鄒氏邑庠生賈士英妻年二十七夫卒姑老

子幼家貧歲饑氏辛勤鞠養仰事俯育備極孝

慈守節五十年子後補邑庠

郭氏醬家河社民賈士祥妻年二十二夫亡

遺二孤俱幼矢志守節孝養舅姑生事死葬皆

能如禮後子成立補庠生守節三十餘年以五俱康

燕間節婦題

旌年月不詳

李氏程可法妻年二十三夫亡子方三歲撫

養成立未幾子復夭又撫幼孫成立雍正二年

題旌

侯氏蕭裔介妻年十九夫亡子甫三月教育

成立苦節五十一年年七十卒雍正二年 題

旌

李氏闕相宸妻年二十七夫亡割股療姑病

兄欲奪其志剪髮以自誓撫三子俱入庠年九

十三終雍正五年 旌

孫氏曹啟賢妻年十六夫亡舅姑俱歿夫之

祖父母年八十餘無所依倚氏紡績供奉撫孤
成立雍正五年 旌

毛氏康慶遠妻年二十五夫亡孝事舅姑課
子遊庠後子又夭與媳任氏同孀居苦節撫幼

孫成立雍正七年 旌
子鐸邑廩生之妻任氏年二十三而孀矢志守

節事姑毛氏以孝聞府尊吳縣尊楊皆旌

王氏楊甫望妻年二十六夫亡子甫週歲無
所依倚採藜藿自給後子方十歲卽教以力田
暇則使就義塾學俾得成立雍正九年 旌

蕭氏郝文賢妻年二十九夫亡翁年九十餘

氏奉事惟謹撫幼子成立雍正九年 旌

蕭氏毛鍾秀妻年二十八夫亡事孀姑節已
食以供醫藥撫週歲孤成立雍正九年 旌

季氏李輪妻年二十八夫亡家貧孝事翁姑
紡績以供甘旨撫繼姪爲嗣雍正九年 旌

葉氏甯琮妻年十八夫亡遺孤在抱氏食貧
訓子後補邑庠苦節四十餘年雍正間 旌表

趙氏蕭有贊妻年二十一夫亡前妻子甫九

歲氏辛勤鞠養俾成立奉養耄姑鄉黨稱孝雍正十年旌

甯氏張弘基妻年二十四夫亡舅姑年老養生送死備盡其禮撫幼孤成立補弟子員雍正十年旌

姚氏劉志儒妻年二十二夫亡舅姑年老子方在抱紡績奉養教子成立後補邑庠雍正十一年旌

楊氏吳琬妻年十九夫亡無舅姑子纔兩月

撫養成立苦節五十餘年卒雍正十一年旌

李氏孫翰妻年二十夫亡無子姑患癰病不能動履氏扶持奉養十一年無怠色繼姪爲嗣撫之成立雍正十一年旌

白氏高妻年二十一夫亡舅翁甲老病氏奉養以孝聞遺孤僅彌月撫育成立二叔俱幼氏撫之如子鄉黨稱之雍正十一年旌

劉氏尹仲成妻年二十六夫亡舅姑俱七旬氏奉養惟謹撫週歲孤成立雍正十一年旌

表

雲 氏陳永貴妻年二十四夫卒姑老子幼氏

仰事俯育備極辛勤人稱孝慈焉尋孤復天氏

已無復望將捐軀以見志念老姑無依乃繼姪

為嗣撫養俾成立雍正十一年 旌表

佟 氏曹沉妻乾隆元年 旌

畢 氏陳一甲妻乾隆元年 旌

魏 氏盧毓花妻乾隆元年 旌

蕭 氏劉通妻乾隆元年 旌

鄒 氏孫可振妻乾隆元年 旌

孫 氏趙璠妻乾隆元年 旌

蕭 氏廩生王孫蘭妻年二十五夫亡守節家

赤貧氏紡績存活事七旬舅姑始終惟謹撫六

歲孤子早補邑庠乾隆元年 旌

周 氏田選妻乾隆元年 旌

齊 氏商鵬九妻年二十四夫亡遺孤二歲氏

紡績為生上供舅姑甘旨下資弱子膏火苦節

五十餘年子補縣庠乾隆二年 旌

王 氏劉京妻乾隆二年 旌

康 氏張捷魁妻乾隆二年 旌

楊 氏李朝華妻乾隆二年 旌

胡 氏郭健才妻乾隆二年 旌

井 氏張蔭選妻乾隆二年 旌

賈 氏段修道妻乾隆二年 旌

姚 氏李芝妻年二十三夫亡無子家貧孝養

老姑訓繼嗣成立補弟子員苦節三十年乾隆

三年 旌

劉 氏陰思恭妻乾隆二年 旌

胡 氏田聚寶妻乾隆二年 旌

王 氏周廣生妻乾隆二年 旌

石 氏何懷璞妻乾隆二年 旌

徐 氏陰自科妻乾隆二年 旌

姚 氏張紳妻乾隆四年 旌

李 氏徐弼龍妻乾隆四年 旌

倪 氏王道復妻乾隆四年 旌

孫 氏張啟建妻乾隆四年 旌

劉 氏毛印龍妻乾隆五年 旌

正 氏趙莊妻乾隆六年 旌

苗 氏劉孔訓妻乾隆六年 旌

石 氏李玉寶妻乾隆六年 旌

王 氏陳子上妻乾隆六年 旌

景 氏賈爾印妻乾隆七年 旌

葛 氏嚴居珍妻乾隆九年 旌

王 氏楊玉秀妻乾隆九年 旌

武 氏高良宰妻乾隆九年 旌

楊 氏劉明璿妻乾隆九年 旌

張 氏王思敬妻乾隆九年 旌

康 氏高奇妻乾隆九年 旌

蕭 氏曹琮妻乾隆十年 旌

富 氏楊聚蘭妻乾隆十一年 旌

楊 氏孫好問妻乾隆十二年 旌

耿 氏郁文燦妻乾隆十二年 旌

李 氏劉海問妻乾隆十二年 旌

苗 氏齊國碧妻乾隆十二年 旌

楊氏孫連舉妻乾隆十二年旌

王氏孫朝賓妻乾隆十二年旌

李氏張永正妻乾隆十三年旌

張氏劉興仁妻乾隆十三年旌

季氏李守鳳妻乾隆十七年旌

倪氏李范妻年十九于歸逾九月夫卒無子

繼姪維垣為嗣撫育教誨母兼父道嗣克成立

以選拔貢入成均乾隆十八年旌

馬氏馮家哨社高繼先妻夫卒姑老子孫

疎族兒為嗣極為伶仃安之若素守節三十餘

年未題旌

景氏杜邦相妻年二十一夫卒撫幼子二歲

俾成立後子與媳俱歿復撫週歲幼孫底於成

立守節六十年未題旌

劉氏甯弘昭妻年二十五夫卒繼姪為嗣守

節五十年未題旌

葛氏村民趙子榮妻年二十七夫亡守節六

六十年未題旌

六十年未題旌

六十年未題旌

苗氏茨榆坨社人張伺妻年二十夫故遺子甫二歲公姑在堂紡績事之色養承歡寒暑無間公姑歿喪葬盡禮撫孤成立苦節五十餘年人稱節未題旌

楊氏大家坨社民孫大志妻年十九夫故無子繼嗣承祧三十餘年人無間言未題旌

戴氏力本屯社庠生朱采妻年二十一適采二十三夫故遺孤甫一歲家貧無以爲養氏晝夜作苦上事翁姑下撫孤子三十餘年鄉黨敬

服翁然稱之未經題旌

陶氏醫家河社民李寅妻年十七適李是年九月夫故無子家極貧氏紡績自給今將四十年矣人嘉其苦節云未題旌

王氏沙城社民汪文貴妻十七歲歸於汪上無翁姑中無伯叔文貴原籍山西寄居樂邑越十餘載夫沒並無田產賃屋以居遺孤女一年十歲孤子二長八歲次方襁褓鄉隣有勸其更適者氏正色拒之曰子雖無業可守有子可依

子去藐孤將誰託守志十三年長子歿氏晝夜
號泣隣人憐之曰曰勿徒自苦也氏泣曰長雖
亡次子在天苟不絕汪氏後獨不可延一綫之
脉乎越五年次子又亡氏大慟曰吾所以不卽
死者爲兩孤耳今已矣無復望矣只有一死以
報汪氏旣而思之死易事也竊恐以薄命婦累
人遂乘夜潛至曠野縊死河邊嗚呼若王氏者
可謂從容就義者矣未經 題旌

霍一氏高家庄社九甲民李成壘妻十七歲于

歸十八歲夫故並無所出晝夜哭泣越年餘母
欲奪其志氏以死自誓母不敢奪勤儉作苦上
事翁姑至老不懈今七十三歲親族莫不欽其
節孝未能請 旌

徐 氏增廣生李穡妻年二十一夫亡無子以
疎支承嗣事姑孝謹教子嚴毅二十餘年冰霜
自矢未 題旌

高 氏醬家河社民張重妻年二十于歸二十
三夫故氏撫孤成立壽至七十二而卒已經府

旌

張氏庠生宋傳臚妻年十七于歸二十六夫

亡今六十二歲守節三十六年未旌

葛氏太學生陰自成妻年二十五而孀未生

子女矢志守節撫夫伯兄子思和仲兄子思肅

爲嗣恩義肫至而均一事舅以孝謹聞歷今三

十餘年矣族黨重之尚未請旌

陳氏廩膳生商卓妻年十五于歸十八歲夫

亡奉姑孝無子年六十五卒未題旌

鄔氏致順屯民張廷桂妻年十八于歸二十

四夫故八十五卒無子未題旌

王氏胡東社民李智軒妻年十八于歸二十

五夫亡守節紡績課子年七十三卒未旌

王氏胡東社民李維新妻年十七于歸二十

六而孀代供子職事翁姑以孝聞撫二子皆成

立今七十一矣未旌

蕭氏故民甯爾平妻年十七歲于歸二十歲

夫故老姑在堂子甫二歲婦苦志守節紡績以

事孀姑拮据以撫幼子歷今三十九年未題旌

張氏故生姚起陶妻十九歲適夫二十六歲夫亡遺子二人家貧無以爲生自勤紡績課子讀書遇子倦讀卽以笞責加之二子俱補入弟子員其事舅姑以孝待妯娌以和久爲鄉里所重迄今苦節三十八年未題旌

劉氏故民在城社又七甲韓效孟之妻十九歲適夫二十七歲夫亡遺子五歲家貧日勤紡

績幸子成立今已生孫迄今苦節三十七年未題旌

張氏故廩生葛鴻籙之妻二十歲適生二十七歲生故遺子六歲有孀姑在堂事之能孝教子成立今已生孫迄今三十年未題旌

高氏力本屯四甲民王承烈妻十九歲適夫二十二歲夫故時翁在堂子甫一歲家貧無倚氏紡織以事老翁拮据以撫幼子苦節四十餘年現今六十八歲教子棟成立鄉黨無間言未

題旌

陳氏廩膳生商雲生妻年二十五歲夫亡遺

孤尚在襁褓姑病氏晝夜服侍湯藥七年始終

不懈撫遺孤成立守節四十餘年 府憲賜額

曰節孝懋慈

陰氏年二十邊庠生蕭斯萼本儒素藉舌

耕以供菽水氏夙夜相夫克盡婦道三載夫亡

家益窘氏操井日勤紡織孝養舅姑無闕親效

苦力經營喪葬如禮撫姪成立以延夫祀苦節

四十年無異志乃未及 上聞而歿

李氏邑民王鴻績妻素明大義年十九歸績

齡族議繼之氏曰姪猶子耳第翁年未邁尙有

望也密勸始代翁納側室舉三子翁歿家貧氏

力撫夫弟俱成立年 旌

登六十有八尙未題 旌

王氏鑲黃旗人黃琦妻年二十五遂失所天

承養無怨色遺二子教育成人歷三十三年如

一日事聞於本旗題 准建坊都統亦旌其門

曰孝慈

完節 張氏邑民蕭嗣謙妻年二十一適夫三載夫

歿尙 旌 歿氏茹茶飲藥撫姪生孫壽五十七而

未題

孫氏 年十七邊邑民石可舉孝事翁姑四年
失偶氏竭歷養親力謀身後事遺子崑
甫襁褓教育成立授室生孫不幸崑亡撫孫大
猷脩極艱辛今年五十有八邑人聞於官現請
旌表

高氏 年十五適邑民劉文進克守清貧夫亡
年甫二十六氏紡織養親能得翁姑歡
撫姪如己子生孫二俱業儒
今年逾七旬真壽特著現請
旌表

壺範

畫荻丸熊授經讀史或表女宗之號或擅堂前
之名此壺範之所由重於寰宇也樂邑堪以刷
音者蓋寡然不可以其寡而闕之也謹存五人

以侯廣

金

張氏 信武將軍齊某妻錦州故工部尚書九
思後也適齊封汝南縣君能撫其前子將軍觀
史氏 從旁問將軍重之將軍卒冰霜自矢貞祐
初蒙古兵入平灤大掠乃攜家之燕亂平歸業
已焚蕩無餘氏甘辛若拮据治家竟能保有宗
祀孀守三十年卒及殯執紼送者千人鄉貢守
素其子也

元

石 氏太守石某女適豐潤縣尹王伯川生子
守與伯川早卒守與亦歿氏撫其妾子無異已
出嘗丐文立碑祖塋紀先世功德翁瓚惡之爲
磨其文而削其妾子名氏撫成立比翁卒猶爲
立石紀瓚不仕高蹈之志人稱爲慈孝兩全云

本朝

趙 氏鄉貢生劉可興妻氏白于歸後上奉祖
舅姑姑無飲助者飲食必精衣服必時和顏悅

色三老成心悅祖姑患背瘡劇甚氏爲洗
濯吮去濃血載餘未嘗有惰容祖姑嘗對人曰
孫媳之孝世所未有我無以爲報願多生貴子
賢孫以爲報耳至奉孀姑尤爲情至氏事之如
母姑待之如母氏嘗患痢姑每默祝請代其相
愛如此教子慈而嚴稍不寬假四子皆列膠庠
貢成均女適人克執婦道莫不稱獎人呼爲孝
婦賢母云

邵 氏鄉民高泉妻果以販菜爲生家極貧氏

于歸後以紡績佐夫治家日常不給必營饘粥
奉姑而自啖糠一日爲糠所梗幾斃隣婦以姑
所餘孟粥飼之氏搖手曰恐難再得奈何分姑
餘聞者莫不哀而賢之後勤儉頗致饒裕而姑
已歿氏終身齋素人謂何自苦乃爾氏泣而言
曰吾姑存日卽蔬水之供不常得吾何忍美食
有餘寧傾所蓄以濟貧困族里咸仰其德

陳 氏次榆社庠生闕綏猷妻嫻內則篤婦
道相夫裕後慈著壹儀年百歲子七人俱列鄉

國學孫十四人已遊泮璧者五人曾孫十五人
元孫一人乾隆十五年奉

旨恩賜雙貴

李氏鄉民李攀桂妻秉性柔嘉持躬節儉
宜家壹儀畢著年百有一歲子三人孫十人曾
孫十五人或士或農親見成立皆氏之教也乾

隆二年奉

旨恩賜貞壽之門

<p>...</p>	<p>...</p>	<p>...</p>
------------	------------	------------



Blank page with some faint stains and a small tear at the top left.



